

小方壺齋

小方壺齋

楚遊紀略

華亭王 澐著

壬子仲春林子安國至自都門欣慨交集孟冬山陰徐子野公至徐子善樂府力學好古手錄羣籍累百十卷傾蓋如故喜得良友矣歲在癸丑暮春之初與徐子遊武昌登黃鶴樓而還未幾蔡公毓榮有湖南之役予謂徐子曰可以登南嶽矣自荆南涉江抵岳陽樓已毀倚舷遠眺洞庭茫茫君山隱見憶太白明湖玉鏡之句爲神似矣至湘陰沂湘水過長沙至衡山縣是爲南嶽週迴八百里迴鴈爲首嶽麓爲足而嶽神之祠則在縣自縣三十里至嶽市平岡疊阜闢關蜿蜒馳道寬衍往時鑿石如砥列植喬松暑不張蓋行者安之今石皆傾圯松刈爲薪矣嶽廟規制宏廣過於岱宗殿爲亂兵所焚有司卽嘉應門奉嶽神以時致祀焉庭中洪武時穹碑巋然鐵香鑪一崇禎間桂落物也廟值朱明峰下流水爲渠相傳元人所鑿又於殿後立黑帝廟若爲厭勝之術者而赤帝子卒應朱鳥之祥方術之言不足信矣今廟尙存自嶽廟而西北折入山簾輿安步客無倦色十五里至半山亭過丹霞湖南二廢寺又十五里登祝融峰予與徐子列坐石上日沒月出天宇沈寥七十二峰皆在趾下湘流如折隱見空外觀止矣良久至望日臺觀岫嶂碑公已乘月遊青玉壇客不及從返宿上封寺是日爲四月初八日佛火黯淡僧廚蕭然殿宇頽圯地尤蒸溼蓋雲霧所出入也僧言寺有田爲他寺所侵緇徒寥落不能自存問及南臺福嚴諸名刹亦俱廢又言南天門下有石船辛卯春一夕大雷雨忽失所在陵谷易位若或有之山刹廢興無論矣予夙聞方廣之勝言於公詰朝將往遊焉早起雲氣入室衣襟沾濡衝雲而下至下方則雨矣次勝業寺問方廣道從者以雨疑之公決策行初行田間涉澗踰嶺崖谷陰森松杉蔽虧升降窅然中道雨大作憩須彌廢寺雨止復行山皆梯田泉左右之阡陌遠者引竹過山如蛇行至不可田則石磊砢無倫次巨者如屋泉則怒飛溢爲大壑不可厲揭伐石爲梁兩崖夾之泉益壯激雲樹蒙茸人行其中形影相接笑語莫辨

如是者累百折復度嶺嶺下羣峰忽合既合復開方廣寺峙其中宛若蓮的寺燬於火門廡不設僧葺茅以居前臨流泉踰橋升階像設略具二賢祠在寺右中祀朱元晦張敬夫二先生左配以林擇之用中同遊也右配以尹洞山臺建寺者也公具牢醴祀焉問湛文簡嘉會堂額羅文恭詩壁僧充儉無知者出寺觀惠汝尊者洗衲泉補衲石旁通一徑時有行者僧云是走湘潭道也昔朱張二先生循是入山遊方廣以厯高臺福巖大名諸刹達於上封今山中道蕝不可行矣宿僧舍泉聲雨聲淙淙竟夕明旦下山過黃庭觀觀魏夫人飛昇石止九仙觀小憩庭中有平石曰九仙飛昇之壇劉坊朱陵洞會薄暮不果南嶽之遊予有意訪求先賢名蹟爲復興地而公以于役遄歸不及行惟命有司葺岫巉石室歸上封侵田重書嘉會堂額爲文立石一置上封一置方廣焉浮湘下長沙訪嶽麓書院規制略如學宮而陋李北海嶽麓碑在麓下甚完好循麓而上中道有小石幢隋文帝立入嶽麓寺殿宇荒落一僧踞踞蕭然四壁壁間書杜少陵詩詠歎久之左有閣時賢所建也置禾本藏經其中一僧檢藏焉俯視湘江近在襟帶懷屈賈之遺風予與徐子有同志矣下湘陰出洞庭茫無畔岸一舟先之夜宿菱蘆間行湖中者四日過沅江至龍陽是爲沅水汭流而上至武陵而還乃由安鄉澧州公安渡江歸荆南是役也自洞庭之東渚以達衡自洞庭之西渚以歸時已仲夏矣乃泝漢水而上過安陸楚郢中先朝承天也至襄陽泊舟峴山下觀羊叔子祠騎行渡漢過樊城抵穀城遂爲武當之遊水經注云武當山一名太和山亦曰案上山山形特秀又曰仙室荊州圖副記曰峰首狀博山香鑪亭亭遠出藥石延年者萃焉晉歷陽謝允含羅邑宰隱遯斯山故亦曰謝羅山傳記云一名太嶽七十二福地之一非真武不足以當之因名武當真武者北方元武之神也而道家神之曰北極佑聖真君先朝洪武間列在祀典永樂靖難尊號元天上帝名武當爲太嶽太和山發帑金數十萬遣隆平侯張信駙馬都尉沐昕等重率軍夫二十餘萬人創建宮觀三十有六十

二年乃成在山中曰太和曰南巖曰紫霄曰五龍在山麓曰玉虛曰遇真在均州曰淨樂其他小宮觀分領於七宮成化間以中官言改迎恩觀爲宮統稱八宮云嘉靖間復發帑金十萬遣侍郎陸杰董立修葺三年始竣蓋先後所糜縣官金錢不貲而歲供香火月給衣廩之屬以時取之民賦特遣中官專司其事有司不得與四方之人聞風奔趨捐輸金帛日以益眾乃權稅以代民賦而羣蠹蠶食其中不可勝計矣隆萬以後諸藩邸爭於山下各建茶庵若周若晉若楚若襄若慶若潞若瑞凡七今潞瑞皆廢餘僅有存者惟周庵規制最壯道士新加修葺猶奉前王遺像焉止宿周庵厥明登山當馳道石坊曰治世元嶽嘉靖時所建也次遇真宮永樂爲張三丰真人建相傳元季真人結茆於此曰此地當興因卽其地爲宮立像左廡天順間贈通微顯化真人銅碑一道士出銅笠半規示客曰亦先朝賜物也入仙關次復真觀小憩道入上黨王昆陽白雲戒師也丰姿修偉自言年八十餘善導引之術弟子甚眾忽聞鄉音叩之則同邑俞姓言尚有邑人趙氏兄弟同學一在太和一在瓊臺云自入仙關馳道廣斥升降咸宜層巒列岫左右縈迴山無童阜林無寒柯雲日所發景出象外私疑稍霽於泉及至龍泉觀喜得泉矣踰橋沿澗懸崖峭蒨豁豁壑魂紆折久之巍然雄峙者紫霄宮也宮南向臨池地勢特尊殿後絕壑爲展旗峰前列三公五老諸峰勢若朝拱襲以喬杉森然冠佩矣殿宇漸圯時方議修未就也西折而北爲朝天宮宮在天柱峰下制殊陜至此始舍輿而步矣坐憩石上問所謂同邑趙道人者適在道左鄉語良久問其兄在瓊臺者曰瓊臺有三今存其一第一泉勝非孔道也自朝天宮以上環以紫城爲天門者三盤道蜿蜒可容二人行石磴峻整左右欄各垂鐵絙攀援以登數武之外氣息不屬行者或以繩繫腰令一人前引以助其力徐子令從者如之予勉力挽絙以行屢上屢息至三天門足盤跚不前矣抵太和宮公以先至共言推挽之艱予因述昔人遊是山者中道宿紫霄宮今一日登峰宜其憊也太和宮在峰側制尤陋公齋宿爲

親視釐從者因進曰頃有祥光見於峰上予未之覩也天未明予與徐子先行從香霧中扶攜而上數折始達天柱峰巔道士輩羽衣雲璈導公以至天方辨色罡風浩然潏決一氣風止雲開旭日東升光射殿中焜耀奪目真武金像威容赫赫若生有掃蕩八極凌厲九霄之概瞻仰久之形神俱肅天日之表人間未覩像設之工一至於斯乃知帝王懷柔之力亦有神焉以相之矣從神四龜蛇一皆金範殿銅冶以金塗之下鑿文石峰巔正平東西稍廣殿東向前對香鑪峰左右二峰矗立如燭因名焉殿旁二小室左以憩客右有司香稅者曰稅不及千金以給軍興費矣四迴銅欄則滇民所造也元時巔有銅亭創殿後徙置峰側往視之上有武昌民姓氏歷朝卽位祭告碑在石壁下自洪熙迄於天啟凡十二惟崇禎無碑問之道士不知也周視石壁已無餘地亦可訝矣下一天門有道人具茗飲客啟口視之皆兒齒自言年七十餘矣至朝天宮升輿循故道行道旁石壁時有引繩垂瓠而下者仰視無徑輿夫曰道人在巖中丐施者也取道往南巖巖特秀拔而宮其上北向前後臨大壑殿宇新葺從殿後東折摩天峭壁色雜紺碧間以石木壁有巖穴道士以神像叢置其間作屋障之衛以石欄鑿石爲龍首可丈許直出欄外置石鑪其上或往炷香焉下視絕壑無不股慄西折一嶺樹尤奇偉嶺盡有臺二曰禮斗曰飛昇俗稱捨身崖往往有愚夫婦蹈死地者公令立石禁止并禁龍首香焉道士列居巖下有若蜂房曩時山中無慮數千計亂後盡傾此爲僅見矣南巖舊有徑走五龍今已廢公聞五龍之勝欲取他道以往時將盛夏輿夫有中喝仆地者予力止公行乃宿玉虛宮宮北向地勢弘敞規制最鉅崇闕三橋擬於皇居近加修葺邸舍皆具沐都尉書齋尙存公素好道家言是日招道人王昆陽輩來會有道人自曝於日中聞風亦至公皆與款接有以殘衲至者詭曰此三丰眞人物也公雅慕眞人時見過眞宮頗頹遂議修焉明日公之鄖陽予與徐子往均州道經迎恩宮已廢入均州城觀淨樂宮宮被寇焚道士新建規制亞於玉虛亦已半州治

矣憩於州邸公歸自鄖陽泛漢水還荆南徐子爲文紀遊以示林子林子曰蜀之峨眉楚之衡山武當宇內名山也予惜未得寓目焉徐子得其二王子得其三何厚幸歟余曰猶有憾峨眉之洪椿坪也武當之五龍瓊臺也皆以僕痼中止聞衡山尚有茅坪九龍之勝亦交臂而失之信如釋氏之說其留爲三生石乎林子曰今欲卜居名山將何從焉余曰昔者我友盧鹿田遊峨眉松陵沈元子遊武當會稽魯學半讀書衡山三子者嘗與我言三山之勝由今觀之峨眉高寒土毛不殖可遊而不可居也林壑之美琳宮之盛莫武當若矣抑亦祈年望仙之倫非嘉遯之幽棲也其衡山乎可車可騎亦可杖也摩地勿泉也泉所及爲田所不及則圃僧廚舉炊不汲而至激湍作春起止自然上藥名香珍果奇卉名笋蔬蔬四時咸具雖松杉之偉不逮武當而美箭佳林亦可娛也且夫魏夫人之石也讓遷二祖之塔也二氏之所宗也若乃唐之李韓其遊焉息焉者也宋之朱張胡林以及先朝羅湛諸公問道講學之區也高山仰止景行行止微衡山我誰與歸二子茫然稱善也

監利風土志

監利王柏心著

監利濱江介湖土膏脈發頗號沃衍俗尙與旁邑等好禮讓崇節儉然脂窳少蓄聚常有水患故也
邑俗娶婦初聘用釵鐲酒果之儀繼行納幣禮親迎先一日設筵邀賓卽父醢子遺意合盞次日謁祖父
贅見舅姑以次及家眾亦有家貧而出贅者

喪事報訃延賓弔名曰開堂發引先一夕凡陳設奠獻諸儀悉准家禮祭用童子數人歌蓼莪之章謂之
唐祭延鄉黨有齒德者題明旌神主是日用鼓樂導從喪車至墓所封窆畢然後歸每七日備祭謂之過
七至四十九日而止死後朝夕上食至百日始罷

立春先一日官師班春於廟農人皆趨觀焉以土牛采色占水旱等災以勾芒鞋占寒燠晴雨陷春餅生
菜親朋會飲謂之春臺席

元日祈年潔屋宇陳設酒醴門外插松柏枝子婦夙興皆盛服祀神男子謁廟謂之出天行少長敘拜戚
友相過賀三日市無列肆宅內亦不掃除至初三日然燭於大門將屋櫓所插松柏枝合楮焚於街際謂
之燒門神紙

上元至十一日張燈至十五日尤盛裁繪剪紙像人物花果魚龍禽鳥陳列門首士女嬉遊達曙
元夜迎紫姑卜問豐歉各鄉村然炬火以照田間聲徹遠近謂之趕門狗食粉餌曰元宵

社日賽會宴飲每歲二月初二八月朔二卽春祈秋報之意

清明祀先祖綺紉角勝歌哭送應楮錢滿陌更以紙旛標塹頭

端午采百草懸艾於戶食角黍以雄黃硃砂入酒飲之用艾莖灑雄黃酒於戶舍牆壁小兒則以其末塗
耳鼻云避百毒是日競渡楚俗皆同而監邑尤興高采烈觀者無不鼓掌以助氣勢

七月七夕祭祖禰謂之迂亡連享七日焚楮薦之曰送亡新死者則是月朔迂祭於此夕奠送

中元具酒饌獻祭先祖鄉村宰牲嘗新父老子弟羣聚宴會謂之過月半寺觀作盂蘭會鐘鳴達旦中秋設酒果爲賞月之會以月之明暗卜湖魚之有無及來歲元宵之晴晦

重陽士大夫登高嘯詠鄉落間蒸餅醢酒聚眾賽會藉野鄉宴

二十四日爲小除日俗謂之小年掃屋塵換鑪灰具酒果祀竈神

除夕更春帖然爆竹於庭以松柏枝插戶楣設酒食聚飲曰團年子弟向家長拜慶曰辭年家中所用器具均散挂紙錢曰散歲達旦不寐曰守歲飯兼數日之炊曰宿歲飯又曰隔年陳

邑居荊州下游地多卑溼三春和煦仍多寒候驚蟄前後鳴雷其寒較甚謂之凍蟲清明斷雪穀雨斷霜故播種早則清明遲則穀雨四月溼氣上蒸礎石帶潤雨每連綿不已俗呼梅爛天亦作霉旺五月多暴風驟雨溪湧川漲謂之端陽水夏至後始盛熱大雨時行每村隴相連雨暘各異俗云夏雨分牛脊二伏炎蒸立秋後尤燥烈至九月中始解十月溫暖俗謂之小陽春往往桃李再花十一月十二月間降霜雪雪多則以爲豐年之兆

物產穀之屬稻麥黍蜀黍粟菽麻 蔬之屬白菜菠菜薑薯甜菜蘿蔔莧馬齒莧芹薺藜茄同蒿葱韭蒜

菹苜蓿芋 麻之屬越瓜黃瓜南瓜冬瓜絲瓜苦瓜瓠瓜壺盧 果之屬梅棗柿李桃石榴橙橘柑菱藕

勃薺海榴葡萄甘蔗茨 花卉桂四季桂牡丹海棠蓮芙蓉芍藥山梔玉簪菊薔薇葵荼縻棠棣木槿鹿

蔥玉蘭水仙萱木香芭蕉月月紅薰艾蘭蘆葦蒲紫荊鳳仙山丹玫瑰翦碎 竹之屬鳳尾竹斑竹苦竹

黃竹文竹水竹叢竹 雜植之屬棉煙草 水之屬冬青桑柘槐烏柏桐麻柳楊棘楝椿榔崇陽柿棠梨

早茨柏楮椒櫻楸黃楊梅 草之屬水蒲茭蘋白茅芒蘆蓼莎繁薇稗蒿荻莠蓬 藥之屬益母草香附

使楚叢譚

青浦王昶著

乾隆庚戌七月三十日湖南湘鄉民童高門控書吏等折色重征諸弊上命偕少司馬覺羅吉君慶往讞之以刑部員外郎許兆椿從自京起程宿盧溝橋蔣檢亭雲師同知署

八月初一日辰刻遇胡雲坡季堂司寇自山東訊案回晤語久之過良鄉夕至涿州時吉君方同雲坡讞事回至此得○○旨候余遂往晤之吉君所從者爲兵部郎中丁田樹員外覺羅麟室

初二日至定興知縣范穀詒來謁乾隆甲午孝廉山東武定府霑化人頗誠懇署事於此又宜興諸生潘興祺來四十八年曾從余西安者

初三日過安肅飯知縣莫曉廣東定安孝廉樸質如三家村學究恐非孔道所宜晚至保定馮魯巖光熊方伯出迎同吉少司馬小飲藩署晚西南風稍涼

初四日過陘陽驛滿城所屬知縣未見晚至望都宿於老母廟旁穹碑數通皆明人所撰也

初五日過定州晚至新樂知縣金寶浙江會稽孝廉云是年乃彭雲楣元瑞冢宰茅耕亭元銘庶子典試也自保定而西歲屢豐且因安南國王及各外藩祝○○釐獻畫閭閻村落無不修整粉飾以昭○昇平郅治之象焉

初六日晨起聞原任兩江總督書君麟來先是高郵句容均有書吏假印冒征兩稅事○○上命昶暨慶大司馬桂往鞠君以是免官逮治刑部議請發伊犁効力自贖既行○○上給以頭等侍衛銜至獲鹿仍○○命爲山西巡撫被○○旨復還至此過寓齋商具奏謝○○恩久之乃別午刻過阜城驛驛爲藥城所屬距縣·里知縣張健未來偕新樂車馬始得行晚至正定宿

初七日晨至欒城縣令夏維翻舊識也飯已行午刻過趙州候車馬久之酉刻至柏鄉車馬缺乏與趙州

同

初八日已刻至內邱晚至邢臺宿頗熱

初九日七十里至臨洛驛永年縣所屬知縣韓修鳳未得見館舍敞朗碧紗如煙其能可知過曹公祠不入晚至邯鄲煙火稠密人物浩穰洵古都會地也

初十日過磁州入河南境肩輿過漳已刻至安陽

十一日七十里過湯陰縣至宜溝驛飯蓋縣所屬也晚至淇縣沿途日望百泉蘇門山蜿蜒綿亘黃翠如畫宜有通儒節士出其間矣過衛輝府治知府德昌三年前曾於開封見之汲縣知縣倪德儒山東萊陽人癸酉同年是夕抵新鄉縣宿

十三日○萬壽聖節五更起與吉少司馬詣關忠武廟設案行禮畢遂行至亢村驛飯又四十里抵河濱時黃水陡落隄外地寬二十餘里其平如簞其淨如鏡雖千萬碌碌人力亦不能致此於是託天工之巧無風彈指而渡又十五里至滎陽驛宿知縣王玉麟來謁又王秋陸復同陳理堂變聞余至來迎秋陸武陟縣知縣而理堂武陟縣書院院長促坐小飲劇談舊事并出近刻吳會英才集索余序之但十二家中附孫淵如星衍亡妻王采薇詩一卷古無此例也余作七言律詩二首以貽之

十四日秋陸理堂來送別午刻過鄭州又五十里過新鄭停少許又四十里至永新驛宿猶新鄭境也九十里中土岡起伏輿行深路中兩崖峭立塵沙空湧甚不適

十五日寅刻起徐尙之書受來見言其詩集已刻八卷矣絮語久之近天明行雨及午甚九十里至許州宿知州李緯匿不出見以車馬短乏故也許州爲赤持缺市肆浩穰從人稍市餅餌瓜果以充節物云十六日晴過臨潁縣飯五十五里至鄆城宿令龍顧來謁余前秋曾見之卽湘鄉人也與之言折漕各弊

多非誣者

十七日至西平知縣焦若鈞來謁問西平距正陽才二百餘里乃作書與張偉瞻達覽使其郵致之又六十里至遂平縣又至御店鎮宿爲確山縣所屬是日初霽涼爽無塵月光如水蓋征途樂事矣

十八日辰刻抵確山縣知縣包敏常州江陰人己酉進士抵任才一月耳具言確山去歲一年中九易縣令地丁至二年未奏銷驛馬虛無有事則取之於民中州年來河水安瀾秋成多稔而凋敝虧缺出於常理之外良可歎矣又四十五里過・鎮小憩晚至明濱驛宿蓋信陽州境也

十九日五初起至武勝關飯渡澗水又四十五里至信陽州知州諸以謙來見車馬不給待久之乃行自此入楚北境山色四面岡嶺迴合竹樹分布如畫而留嶺景尤勝其間土田衍沃陂塘澹沱又有長溪互之家家青山臨流安徽湖北風景多如此洵可卜居也晚至李家寨宿

二十日曉行頗寒五十里過觀音河又三十里至廣水店晚至小河・宿爲孝感縣地連日夫馬不繼行次竭蹶不意河南湖北郵政之弊如此蓋州縣各站均有額設馬匹而州縣所購者不過十之三四非惟培克馬價而馬食之草豆并侵蝕之及有差過境則取民馬以供應馬之倒斃與否置之不惜其鄰境之無馬者亦維繫之謂之過站往往有過六七站而不已且給草料不過少許馬夫號呼叩首而悍役尼之不放行道多爲心惻者至此十有三四馬之豆草亦購之民間給價值止十之五六而收草也大其秤以二當一且又指草爲潮溼爲朽腐而不肯收鄉民輸草必大車十餘輛一車牛馬四人夫二住一日則所費不可支於是又出貲賄諸家人書役然後得收其納豆同之民之疾首蹙額實有不勝言者

二十一日過柳店晚至楊店宿僅行幾十里以馬疲憊極實不能行也孝感縣知縣王瑞漢軍舉人來謁似猶能事者

二十二日子刻行卯正過雙廟黃陂縣所屬也又四十里過澗口戊戌因漢口被淹予自武昌逕至此又四十里過漢口時已下春不入候館遂渡江東南風緊側轂逾時始達彼岸登黃鶴樓畢制府沅與布政使陳望之淮按察使成用濟汝舟糧道舒永阿鹽道保定巡道張長庚並集而武昌知府德興襄陽知府楊芳春宜昌知府張映璣皆在遂請○○聖安坐談有頃偕吉少司馬飯於江樓日漸昏黑江色蒼茫雲煙中惟見商船漁舶燈光點點而已歸宿於試院楊西和倫來復留款語而去

二十三日拜司道諸君還至制府署小飲別四年矣當杯促膝款語舊遊頗豁懷抱也入見其淑愛智珠方從蓬心學畫山水及細君丁含翠伊雙芝又於賓館中見嚴子進觀蓋東有子也又見江甯方子雲正衡而行六十里至東湖長隄如虹煙波渺瀰及驛已擊柝矣驛中馬匹俱無

二十四日七十里至山坡驛猶江夏所屬過此爲官塘驛則蒲圻境也又六十里至咸甯縣宿知縣朱鑑來見漢軍舉人驛務荒廢與前數站略同

二十五日過鳳山驛又飯於港口驛過此則入湖南境矣至臨湘縣宿於萬年庵蓋梁文定公撫湖時所葺余前此曾居之是夕浦撫軍霖王藩使懿德王署臬使家賓均遣使來迎岳州府知府余延良來見蓋刑部尙書余公文儀子舊刑部郎中也

二十六日過臨湘縣又過雲溪驛參將等帥隊伍來迎戊刻抵岳州府治館卽在岳陽樓下樓爲畢制府新葺行館亦皆修觀惟月已近晦水天如墨一無所見也

二十七日過青岡平江兩驛長沙府陳嘉謀來迎余舊識也又至歸義驛宿

二十八日六十里過湘陰驛又六十里至·鋪又六十里渡·抵省巡撫浦君學使張君姚成又兩司皆來迎會已三更矣遂入館舍宿

二十九日飯於巡撫署

九月初一日飯於學使署未刻行由水路

初二日循湘水行水綠如碧玉色兩崖倭安迥亦有腳插水中者風景絕勝湘潭令趙貴覽來謁江蘇常熟人以其父令王槐所刻犀觥圖考出示蓋文毅公用賢其六世祖也文毅爭江陵奪情杖謫時許文穆方爲庶子以觥贈行并刻銘於上云云其後失之輾轉流入曲阜顏氏翁覃溪方綱宮詹曾得其拓本稍聞乃謁覃溪於江西學署乞作書與顏囑其歸趙顏欣然與之因刻以徵詩也聞湘潭以下淺不勝舟復登陸

初三日至湘鄉住縣署地卑溼早晚飛蚊撲面

初九日此地久不雨風雨忽作殊愴然也

初十日雨

十七日讞事畢從湘鄉回

十八日至湘潭下船薄暮風緊頗寒偕同人遊包孝肅祠後有小地修竹芙蓉繞之

十九日早微雨將抵郭江旁石壁色紅而方皴余有句云樹爲新栽餘嫩綠石多方折染微紅仍舍於貢院良齋以新搨李北海嶽麓寺碑相贈鋒棧盡出神采煥發蓋以細紙佳墨又令良工不論時日從容搨之故與書肆所售相去倍蓰如此當似隆萬前所搨本也

二十一日鄭家錢來蓋迂谷之子以其祖父詩卷見示長沙監生張仁塢來見蓋其父桂陽州知州張載煌宏隱坐法歿仁塢幼不能歸里生母陳彬娥撫之成立今二十九矣稍通文理能隸書而彬娥亦能畫花卉做徐天池筆法見貽風神軒舉可念又有長沙諸生杜大本隸書亦工